

LA SEGUNDA EPISTOLA DE SAN JUAN APOSTOL

YA'A KUU CARTA UU JA NI CHAA SAN JUAN APOSTOL NUU TAKA ÑAYIVI KAKANDIJA

Sikì íchi ndáa jíin tú'un kúndá'ú inji tá'an

¹Máa-ná kúu máa cháa ñá'nu-ga. Te cháa-ná tutu yá'a nuu níí, ña'an ní kaji-ya. Te kúndá'ú ndija inji-ná níí. Te nasu máa ñin-ná, chí suni taká ñayivi kájiní tu'un ndaa. ²Chí ñú'un tu'un ndaa inji-yo. Te kunchaa jíin-yó taká kivi. ³Tu'un luu ío inji, jíin tú'un sá'a tuká'nu inji, jíin tú'un kuaká'nu inji, ja vái onde nuu máa Táa-yo Dios jíin núu Sé'e-ya Jesucristo, ná koo ndija inji-ní jíin tú'un kúndá'ú inji. ⁴Xaaj kúsií inji-ná, chí ni ñi'ín-ná tu'un ja kájika ndaa se'e-ní jíná'an-i, ná tu'un ni tá'ú tínu máa Táa-yo Dios nuu-yo. ⁵Te vina nána, tú cháa-ná tutu yá'a ja tá'ú-ná ñin tínu jáa núu-ní. Chí sua ká'an nda'ú-ná jíin-ní sikì tú'un ni ñi'ín-yo onde xnáñúú, ja ná kúndá'ú inji-yo tá'an-yó. ⁶Te ya'á kúu tu'un kúndá'ú inji, ja ná káka-yó ná tu'un ni tá'ú-yá tínu nuu-yo. Ya'á kúu tínu ni ta'u núu-ní: Ja ná káka-ní jíin tú'un-ún, ná tu'un ni kajini so'lo-ní onde xnáñúú.

Sikì já xndá'ú

⁷Chí kua'a ñayivi káxndá'ú ñá'án, vai koyo-i inji ñuyívi. Te ñayivi-ún, tú kája'a-i tu'un ja ní kii Jesucristo jíin yíki kúñu-ya. Ñin ñayivi súan kúu ñayivi xndá'ú ñá'án. Te ñayivi jíto u'u Cristo kúu-i. ⁸Koto va'a-ní máa-ní jíná'an-ní, ná va'a tú xnáa-ní tínu ni kasá'a-ní. Chí sua ná ní'ín vá'a-ní ya'u-ní. ⁹Nú ndé ñayivi sáñi'ín inji-i, te tú jíku-i jíin tú'un Cristo, tú ncháa Dios jíin-i. Te nú ndé ñayivi jíku jíin tú'un Cristo, ncháa máa Táa-yo jíin Sé'e-ya jíin-i. ¹⁰Te nú ñin ñayivi jáa-i nuu-ní, te tú ndiso-i tu'un yá'a, ma kuátá'ú-ní-i kunchaa-i inji ve'e-ní, ni ma ká'an-ní sa'an kúta'u jíin-i. ¹¹Chí ñayivi ká'an jíin-i, chíndéé tá'an jíin-i sikì tínu ñáa sá'a-i-ún. ¹²Vasa ío kua'a tú'un chaa-ná nuu-ní, ko tú kuní-ná ka'an-ná jíin-ní jíin tutú jíin tinta, chí ñúkuu inji-ná jaá-ná nuu-ní jíná'an-ní. Te ndatu'ún jíin yú'u-yo, ná va'a ná kúsií xaaj inji-yo. ¹³Taká se'e ku'u-ní, ja ní kaji-ya, káka'an-i ja ná sándéé inji-ní. Súan ná koo. Amén.